




Republika e Kosovës
Republika Kosovo / Republic of Kosovo
Kuvendi i Komunës Rahovec
Opština Skupština Rahovac / Municipality of Rahovec



Njësia Nr./Br./No 01 (Kuvendi i Komunës)

Nr./Br./No 05 Nr. i faq./Br.str./No.pg 13

Data/Datum/Date 26 / 09 / 2019

PROCESVERBAL

Nga mbledhja e rregullt e Kuvendit Komunal të Rahovecit, e mbajtur më **30.08.2019**, me fillim në ora **10:15**. Mbledhjen e kryesoi: Kryesuesi i Kuvendit z. **Afrim Dina**. Konstatohet se kuorum, për mbajtjen e mbledhjes kemi:

Kryesuesi – Fillimisht më lejoni t'iu përshëndes, i nderuar nënkryetar i Komunës z. **Fatmir Iska**, drejtor të drejtorive Komunale, përfaqësues të OSBE-së, gazetarë, media, dhe ju kuvendarë të nderuar, po ju lexoj rendin e ditës:

REND DITE

1. Shqyrtimi dhe Aprovimi i Procesverbalit nga mbledhja e kaluar,
2. Pyetjet dhe përgjigjet në pyetjet e kuvendarëve,
3. Shqyrtimi dhe aprovimi i Propozim Vendimit të Kryetarit të Komunës, për dhënien e pronës së paluajtshme komunale në shfrytëzim afatshkurtër personave fizik dhe juridik,
4. Shqyrtimi dhe aprovimi i Propozimit të Kryetarit të Komunës për ndryshimin dhe plotësimin e Rregullores për Taksa, tarifa, ngarkesa dhe gjopa komunale,
5. Informatë mbi implementimin e Planit për investime në hapësirat e hapura publike në Komunën e Rahovecit,
6. Rishqyrtimi dhe aprovimi i Draft – Rregullores Komunale për Transparencë Komunale 2019.

Pikët shtesë

7. Shqyrtimi dhe aprovimi i Propozim Vendimit të Kryetarit të komunës për nisëm e bashkëpunimit komunal ndërkombëtar për binjakëzim midis Komunës së Rahovecit dhe Komunës së Frascineto,
8. Shqyrtimi dhe aprovimi i Propozim Vendimit të Kryetarit të komunës për nisëm e bashkëpunimit komunal ndërkombëtar për binjakëzim midis Komunës së Rahovecit dhe Komunës së Civita.

Kryesuesi – Të nderuar kuvendarë komuna jonë do të lidhë një marrëveshje apo binjakëzim me dy komuna nga shteti Italian, e ato janë Frascineto dhe Civita. Kjo marrëveshje do të lidhet me 22 Shkurtë, dhe neve si komunë na është kërkuar nga MAPL-ja që në kuvend të merret një vendim për aprovim të kësaj marrëveshje, prandaj para se të filloj me procedimin e rendit të ditës, kërkoj nga ju që ti votoni edhe këto dy pika shtesë për këtë mbledhje. I qes në votim këto dy pika që i prezantova të jenë pikat shtesë për këtë mbledhje: Konstatohet se unanimisht është aprovuar propozimi që të përshihen edhe këto dy pika shtesë për këtë mbledhje të kuvendit. Tani të nderuar kuvendar/e a ka dikush të shtoj diçka sa i përket rendit të ditës,

nëse jo e qes në votim rendin e ditës së bashku me këto dy pika shtesë: Konstatohet se unanimisht është aprovuar rendi i ditës. Kalojmë në pikën e parë të rendit të ditës:

1. Shqyrtimi dhe aprovimi i Procesverbalit nga mbledhja e kaluar.

Kryesuesi – A ka dikush të jap ndonjë vërejtje apo ndonjë sugjerim sa i përket procesverbalit nga mbledhja e kaluar?

Ali Zhuniqi – Përshëndetje për të gjithë të pranishmit në sallë, të nderuar tek diskutimi imë në procesverbal kam vërejtur që ka mangësi, sepse nuk më është përfshirë i gjithë diskutimi, prandaj kishte me qenë mirë që personat që janë përgjegjës të kenë kujdes dhe çdo fjali që ne e themi këtu të evidentohet në procesverbal.

Kryesuesi – Të nderuar gjithsesi se këto vërejtje do të përmirësohen, a ka edhe dikush ndonjë vërejtje apo sugjerim, nëse jo e vë në votim Procesverbalin nga mbledhja e kaluar: Konstatohet se në mënyrë unanime është aprovuar pika e parë (1) e rendit të ditës. Kalojmë në pikën e dytë të rendit të ditës:

2. Pyetjet dhe përgjigjet në pyetjet e kuvendarëve.

Rexhep Oruqi – Përshëndetje për të gjithë të pranishmit në sallë, do i ngrisë dy çështje, e para është në cilën fazë ka arritur ndërtimi i rrugës Rahovec Potoqan, duke e ditur se që katër vite ka filluar që të rregullohet kjo rrugë dhe tani ka mbetur ende pa përfunduar. Kam kaluar një ditë në atë rrugë dhe e pashë që asfaltin i kësaj rruge ka nisur të dëmtohet, për arsye se nuk e ka ende shtresën e dytë, mirëpo kjo rrugë nuk ishte e përfunduar as me shtresën e parë deri në fshatin Patoqan. Pyetje e datë ka të bëjë me rrugën e cila kalon në oborrin e ish fabrikës 18 Nëntori, të nderuar ne në kuvend e kemi marrë një vendim ku e kemi shpallur si interes të përgjithshëm, por sipas informatave që i kam nga tre pronarë sa janë në këtë rrugë, njëri nga pronarët është ankuar dhe tani procedura ka shkuar në gjykatën themelore në Prishtinë. Përsëri po e cekim se sipas informatave që i kam edhe në gjykatë ka përfunduar procedura në favor të komunës së Rahovecit, kjo rrugë e lidhë lagjen e Kërstit me pjesën tjetër të qytetit. Pres që të na jep më shumë informata drejtori për këto dy pyetje që i parashtrova.

Mirjeta Krasniqi – Përshëndetje për të gjithë të pranishmit, pyetje ime ka të bëjë me DKA-në, a ka organizuar ndonjëherë komuna e Rahovecit transport për nxënësit e Kramovikut, Guri të Kuq, Çifllak dhe Polluzhë, pra që ti dërgoj deri në fshatin Ratkoc pasi që ky fshat gjendet më afër këtyre vendbanimeve. Diku rreth 50-60 nxënës nga këto fshatrat që i përmenda shkojnë në shkollën e mesme në Gjakovë, e di që nuk kemi të drejtë ne të ju imponojmë atyre shkollimin e mesëm, por nëse komuna e tyre ka shkollë të mesme pse të shkojnë ata në ndonjë qytet të komunës tjetër të vijojnë shkollimin e mesëm. Me këtë veprim ne humbim deri 60 orë që i bie diku të humbim 3 mësimdhënës, pra nëse nuk ka pasur ndonjëherë ky transport, kërkoj që të sigurohet ky transport për këto fshatra që i përmenda më parë.

Afërdita Thaqi – Përshëndetje për të gjithë të pranishmit, kam një pyetje për Kryetarin e Komunës, i nderuar a jeni në dijeni për nxjerrje të zhavorrit në fshatin Çifllak, pasi që shfrytëzuesit e pandërgjegjshëm të zhavorrit kanë filluar që të marrin zhavorr dhe me këtë kanë filluar që ti dëmtojnë edhe ato pak rrugica që kanë mbetur pa u dëmtuar. Po ashtu me këtë janë duke e shkatërruar edhe mjedisin hapësinorë, çdo njëri që e ka njohur atë pjesë për bukuri natyrore, por tani është bërë një çoroditje nga askush tjetër por vetë nga faktori njëri. Prandaj kërkoj nga kolegët e mijë kuvendarë që të më përkrahin në këtë iniciativë, ku i kërkoj kryetarit të komunës që të i dërgoj inspektoratin dhe të i ndërpresë punimet atyre. Problemi tjetër që dua të parashtroj është, mos ndërtimi i trotuarit që të qon nga fshati e deri tek fusha e sportit, kjo pjesë është e frekuentuar më së shumti nga fëmijët sepse në këtë rrugë shkojnë edhe në shkollë, prandaj e lusë kryetarin që të përshpejtoj procedurat dhe të ja fillojë sa më parë ndërtimi i këtij trotuari. Po ashtu kërkoj që ky trotuar të i plotësoj kriteret e një trotuari, të ketë gjerësinë e nevojshme, prandaj sa më shpejtë aq më mirë sepse tani ja fillon mësimi dhe fëmijët janë të rrezikuar nga makinat kur kalojnë në këtë pjesë. Kërkesa ime tjetër është që të vendosen disa policë të shtritur tek hekurudha, një tek kafiteria Cani dhe një tek kooperativa e Çifllakut, këto janë për ne banorët e Çifllakut çështjet emergjente.

Refki Kryeziu – Përshëndetje për të gjithë të pranishmit, kohëve të fundit nga niveli qendrorë Ministria e Infrastrukturës ka bërë ndërtimin e disa rrugëve në komunën tonë, por këto rrugë nuk janë duke u përfunduar ashtu si duhet. Vlen të theksohet se rruga transite mbi qytetin e Rahovecit është pa mbrojtje

anësore, në këtë rrugë mundet shumë lehtë të vije deri tek ndonjë fatkeqësi, prandaj kishte me qenë mirë që sa më shpejtë të mirën masa ndaj kësaj çështje. Po ashtu ju kisha bërë me dije që të shikoni dhe ndërtoni edhe këto rrugë ekzistuese, vlen të theksohet rruga Fortes – Patoqan i Ulët dhe i Epërm, kjo rrugë është tepër e amortizuar, prandaj mirë kishte me qenë që edhe në këtë rrugë të mirën masa për sanimin e saj. Pasi jemi në fillim të vitit shkollor, ne disa që i përkasim arsimit që disa ditë kemi filluar që të paraqitemi në shkolla, dje me datë 29.08.2019 kolektivi i shkollës së lartë profesionale “Selajdin Mullabazi – Mici”, që i përkas edhe unë vetë këtij kolektivi kemi mbajtur një mbledhje. Në këtë mbledhje mungoi Drejtoresha e kësaj shkolle znj. Vjollca Vuçitërna, në diskutim e sipër me kolektivin disa thanë që është suspenduar, kurse disa tjerë thanë që është larguar nga puna, ajo që neve na intereson është që të na tregoj Kryetari i ose drejtori i DKA-së, çka ka ndodhur realisht me këtë drejtoresh.

Fehmi Cena – Përshëndetje për të gjithë të pranishmit, desha ta ngrisë një çështje e cila u përmend më parë nga z. Oruqi, sa i përket rrugës Rahovec – Potoqan i Ulët, ka dy tre vite që është duke u ndërtuar kjo rrugë, ajo që bie në sy është se punimet janë duke u zhvilluar shumë ngadalë. Një pjesë është asfaltuar dhe asfalti nuk është aspak cilësor dhe ka filluar që të dëmtohet, pastaj ka ankesa nga qytetarët se në zgjerimin e kësaj rruge disa bujqve është duke ju marr shumë tokë nga vreshtat e tyre dhe nuk pyeten për asgjë. Një vërejtje që una ta praqes rreth ndërtimit të kësaj rruge është çështje e ndërtimit të një ure tek pjesa e kësaj rruge tek livadhet e Dublanës. Më parë kur ka qenë kjo rrugë me zhavorr ka qenë edhe një urë, në momentin kur ka filluar të ndërtohet kjo rrugë është prishur kjo urë dhe e kanë futur një gyp deri në një metër gjerësi, por ky gyp nuk i plotëson kushtet që të i kryej rolin e urës. E pyes drejtorin a është paraparë që në këtë projekt të jetë ura sepse aty është një grykë e madhe dhe sa herë bie shi tani aty krijohen vërshime dhe nëse kjo rrugë asfaltohet kështu me këtë gyp atëherë do të dëmtohet sa herë që do të ketë reshje.

Ali Zhuniqi – Kam një pyetje për drejtorin e shërbimeve publike, kemi marr disa ankesa nga bashkëfshatarët rreth rrugës që të dërgon nga Fortesa në fshatin Celin, janë dy ose tre vende që është dëmtuar goxha shumë kjo rrugë sidomos tek pjesa e cila përçon nga lagja e Zhuniqve dhe një pjesë afër fshatit Celin, në këtë pjesë një shok i imë e ka dëmtuar makinën dhe riparimi i saj ka kushtuar diku rreth 500,00. €, prandaj duhet të mirën masa urgjente që të riparohet kjo rrugë. Kemi diskutuar edhe më herët për vazhdimin e projektit të lumit i cili përçon në fshatin Fortesë, keni thënë se për shkak të mos respektimit të kontratës nga ana e kompanisë i keni ndërprerë kontratën, tani dua ta di se në cilën fazë janë punimet dhe a ka gjasë që kjo punë të rregullohet më shpejtë për arsye se jemi duke u ofruar stinës së dimrit, pastaj siç e dini vërshimet janë zakonisht të mëdha dhe por rezulton pastaj në dëmtime në ekonomi familjare. Shqetësimi tjetër është sa i përket kompanisë për mbledhje të mbeturinave e cila është kontraktuar nga komuna, kjo kompani nuk i merë gjërat e lëngshme, arsyeja e tyre është se nuk e kanë të përshtirë në kontratë këtë shërbim. Për mendimin time kjo mundet të jetë edhe e arsyeshme, për arsye se kam parë një herë kur është ndalur kamioni i cili i ka marrë mbeturinat dhe një sasi e lëngut u derdhke në rrugët e fshatit, kjo i kontribuon infeksioneve dhe u jep influencë për përhapje të gripit. Mendoj se drejtori i shërbimeve publike duhet të bisedoj me këto kompani dhe të shikojnë se cilat janë gjasat që të sanohen këto probleme.

Munib Durguti – Përshëndetje për të gjithë të pranishmit, desha të ndërlihem rreth çështjes që e ngrita në seancën e kaluar, bëhet fjalë për tre pengesa që kanë qenë në rrugë afër palestrës Mizahir Isma, në seancën e kaluar e kem ngritur çështjen që këto pengesa në rrugë ose policë të shtrirë kanë qenë të pa shenjëzuara. Por pas adresimit të kësaj çështje në seancën e kaluar, i menjëhershëm ka qenë reagimi i drejtorisë për shërbime publike dhe premtimi i kryetarit të komunës së kjo do të kryhet, dhe brenda një afatit prej 10 dite këto pengesa janë shenjëzuara dhe tani gjithçka është në rregull. I falënderoj për këtë veprim dhe i kujtoj se një bashkëpunim në mes qeverisjes dhe kuvendit shkon në dobi të qytetarëve, poashtu besoj se do të ngritët edhe pjesa tjetër e shqetësimit që e kam ngritur në seancën e kaluar, ajo është vendosja e një pengese afër trafo stacionit tek gjimnazi Xhelal Hajda – Toni, po ashtu është e nevojshme edhe vendosja e një pasqyre për qasje më të lehtë në rrugën Gëzim Hamza – Piktori, meqenëse është një rrugë goxha e ngarkuar dhe ka disa rrugica anësore të cilat e vështiroshen qasjen në atë rrugë.

Rrukije Krasniqi – Përshëndetje për të gjithë të pranishmit, pyetje ime shkon për drejtorin e DKA-së, dua ta di se sa munden të pajisen nxënësit tonë në shkolla me libra sipas planeve korekulare, meqenëse mungesa e librave sipas planeve korekulare do të na paraqes një problem dhe një kaos. Nëse e marrim një shembull të vetë planit të klasës së gjashtë dhe klasës së shtatë nga lënda e biologjisë do të punojnë me tre libra, pra klasa e gjashtë ka me punuar me librin e klasës së 6,8 dhe 9, kurse klasa shtatë do të punojë me librat e klasës së 6,7 dhe 9. Do të jetë shumë e vështirë për nxënësit dhe një punë shumë e vështirë për mësimdhënësit, harmonizimi i librave me planet korikulare kishte me qenë një lehtësim shumë i madh.

Trajko Shariq – Përshëndetje për të gjithë të pranishmit, pyetje ime ka të bëjë rreth rrugës e cila fillon nga Sahat Kulla e deri tek ambulanca në lagjen e epërme të Rahovecit, po ashtu edhe të gjitha rrugët tjera të cilat gjenden në lagjen e epërme janë të dëmtuara. Po ashtu edhe me ndriçim publik kemi probleme në lagjen e epërme, kemi mungesa në disa vende të ndriçimit publik, ne po ashtu edhe me çështjen e kanalizimit po kemi probleme sepse gypat e kanalizimit janë të dëmtuara dhe në disa vende derdhet jashtë uji i fekaleve, u shkakton dëme tek banorët si të komunitetit serb ashtu edhe shqiptare dhe atij RAE.

Kryesuesi – Ju falënderoj për pyetjet e bëra, nëse ka ndonjë prej drejtorëve që të ju jep tani përgjigje fjala është e tyre, nëse jo atëherë munden në mbledhjen e ardhshme të ju përgjigjen, po ashtu kanë mundësi edhe me shkrim të ju përcjellin përgjigjet.

Përparim Krasniqi – Përshëndetje për të gjithë të pranishmit në sallë, i nderuari z. Rexhep Oruqi, sa i përket rrugës Rahovec Potoqan, ky është një projekt i vjetër i vitit 2016/2017, por për shkak të mungesës buxhetore dhe për shkak të kontratës e cila është e madhe është duke hezitur punë kryesi të kryej punët pa i pasur mjetet e zotuar. Kjo është njëra nga shkaqet kryesore që është neglizhuar puna në këtë segment, përndryshe për momentin jemi duke punuar dhe duke bërë disa drenazhime të asaj rruge sepse ka pasur disa dëmtime nga shtresës së parë të asfaltit, po ashtu jemi duke u marrë me një pjesë të urës që e ceku edhe doktori. Po ashtu do të shikojmë mundësinë që të bëjmë edhe disa zgjerime sepse kjo ka qenë edhe kërkesë e bujqve, sepse është krijuar jo një qasje e mirë për disa banorë që të kyçen tek arat e tyre, ne po ashtu kemi bërë kërkesë edhe në ministri për mbështetje financiare për këtë projekt sepse jemi minus edhe 400,000.00 € që të mbyllet projekti në tërësi. Sa i përket rrugës tek ish fabrike 18 Nëntori i nderuar ajo është çështje ligjore dhe nuk na përket neve, por në momentin që vije vendimi final ne do të planifikojmë ndërtimin e kësaj rruge. Sa i përket trotuareve që bërë pyetje e nderuara znj. Afërdita Thaqi, po e nderuar jam i njohur por shpresojmë vitin e ardhshëm do të ndajmë mjete më shumë sa i përket ndërtimit të trotuareve, dhe besoj se do të realizojmë shtrimin e trotuareve edhe në atë pjesë. Në këtë vit në fshatin tuaj është duke u ndërtuar Ndriçimi, QMF-ja dhe disa investime tjera. I nderuari z. Refki Kryeziu sa i përket rrugës së transitit që është mbi qytetin e Rahovecit, ky ka qenë një projekt i vjetër të cilin e kemi trashëguar dhe e kemi realizuar. Por në kuadër të këtij projekti nuk kanë qenë të paraparë mbrojtësit e rrugës, prandaj ne e kemi realizuar ashtu siç ka qenë projekti, tani ne kemi bërë kërkesë në Ministrinë e Infrastrukturës dhe besoj se shumë shpejtë do të bëhet edhe kategorizimi i rrugës, pra ta merë përsipër Ministria e Infrastrukturës këtë rrugë. Kurse në projektin katër kursi Rahovec Xërxë është paraparë edhe mbrojtësit anësor, prandaj besoj se si të lidhet kontrata do të realizojmë këtë premtim. Kurse sa i përket rrugës Rahovec - Potoqan i Poshtëm jam i vetëdijshëm që kjo rrugë është e dëmtuar, por ashtu edhe rruga Fortes - Celinë është shumë e dëmtuar, ne kontratën për mirëmbajtje të rrugëve e kemi të lidhur, por kemi mungesë të buxhetit për të realizuar këtë vit, shpresoj se vitin e ardhshëm në pranverë do të realizojmë këto dy segmente se me të vërtetë janë në gjendje jo të mirë. I nderuari z. Fehmi Cena sa i përket pyetje suaj i dhashë përgjigje, por po ju them se ne jemi aty jemi duke punuar në këtë rrugë, kanë ardhur edhe disa kërkesa sepse kanë filluar të dalin banorët edhe me vendbanime në këtë pjesë. Ne kemi disa kërkesa nga ta për shtrimin e rrjetit të rrymës elektrike, por të ju them të drejtën ne kemi në mungesë në draft Rregulloren për Taksa, tarifa, ngarkesa dhe gjoba, për shfrytëzimin e gypave nëntokësor, por në mbledhjet e ardhshme do të kërkoj ndihmën e juaj që të futen këto taksa që ata qytetar që dëshirojnë të i shfrytëzojnë këto gypa të paguajnë një taksë të vogël në momentin që kyçen, pra vetëm një herë e jo të taksohen çdo vit. I nderuari z. Ali Zhuniqi sa i përket kompanive për mbledhje të mbeturinave, është e vërtetë sepse kemi edhe anketa tjera nga banorët, por është e vërtetë që

kompanitë nuk mundën të i ngarkojnë me gjëra të lëngshme kamionin për mbeturina sepse kur shkojnë të i hedhin mbeturinat duhet të paguajnë tonazhin e mbeturinave. Faleminderit i nderuari z. Munib Durguti për fjalët që i thatë sa i përket pengesave në rrugë, ne jemi bashkërisht këtu dhe çdo shqetësim tuajin do të mundohemi që ta përcjellim në teren. Kurse sa i përket sinjalizimit dhe pengesave tjera në rrugë, ne deje kemi marrë vendim për një grupe punues së bashku me policin e Kosovës, ekspertët e komunikacionit dhe zyrtarët e komunës dhe besoj se shumë shpejtë do të dalim në qytet që ti verifikojë të gjitha këto probleme. I nderuari z. Trajko Shariq rrugët janë të dëmtuara, ne e kemi kompaninë për mirëmbajtje të rrugëve do ti autorizoj që ta vizitojnë atë pjesë dhe të shohin se çka mundet të bëhet, kurse sa i përket kanalizimit ka mundësi të ketë ndonjë bllokim, është kompania KRU – Gjakovae cila mirë me de bllokimin e tyre, prandaj është mirë që të ja adresoni atyre kërkesën, por do të shohim edhe ne se çka mundemi të bëjmë. Kurse sa i përket ndriçimit publik ne e kemi paraparë që në rrugën Bekim Isma të bëjmë ndriçimin e ri me standarde, kjo është në proces të kontraktimit dhe si të lidhet kontrata do të ndriçojmë edhe atë rrugë.

Fehmi Cena – I nderuar pyetje ime ishte konkrete a është e paraparë që të ketë urë, sepse ajo rrugë do të jetë e përhershme dhe nuk do të jetë rrugë fushore, nëse nuk është paraparë mirë është të parashihet.

Përparim Krasniqi – I nderuar ne jemi duke i ekzekutuar punimet sipas projektit që është paraparë për rrugën Rahovec – Potoqan, nëse mungon në projekt ura, atëherë ne mundemi me dalë në teren dhe të shikojmë se çka mundemi të bëjmë. Përndryshe aty janë vendosur disa gypa për qarkullim të ujit, po ashtu pak më poshtë gjendet edhe ura.

Afërdita Thaqi – Edhe unë e kam një pyetje sa i përket rrugës Rahovec – Potoqan, kur ka qenë e paraparë kjo rrugë të përfundoj dhe sa kanë qenë të paraparë të bëhen pagesat për këtë rrugë sepse nuk kemi kurrfarë informacione.

Përparim Krasniqi – E nderuar kontrata është 845,000.00 €, e cila është lidhur në vitin 2016 kontrata dhe është dashur të kryhet në vitin 2018, por për shkak të mungesës së mjeteve është shtyrë edhe këtë vit, por nëse kemi mjete shtesë në këtë vitë e autorizojmë kompaninë dhe kemi mundësi me që të përfundojmë projektin.

Kryesuesi – Ju faleminderit drejtor, të nderur kuvendar përgjigjet tjera në pyetjet e parashtruara do i merrni në mbledhjen e radhës. Kalojmë në pikën e radhës të rendit të ditës:

3. Shqyrtimi dhe aprovimi i Propozim Vendimit të Kryetarit të Komunës, për dhënien e pronës së paluajtshme komunale në shfrytëzim afatshkurtër personave fizik dhe juridik.

Artan Asllani – Përshëndetje për të gjithë të pranishmit, para vete keni propozimin e kryetarit për dhënien në shfrytëzim të pronës së paluajtshme, pronë shtetërore e Komunës së Rahovecit e cila gjendet zonën kadastrale në Xërxe tek depot e ish Matreksit. Hapësira e kësaj zone sipas certifikatës është 5587 m², por në shfrytëzim jepet vetëm hapësira prej 800 m². Qëllimi i dhënien në shfrytëzim i kësaj prone është që të ngritët vlera e asaj prone, si dhe të ju jepet në shfrytëzim personave që janë të interesuar të shfrytëzojnë veprimtaritë e tyre që kanë qëllim rritjen e kapaciteteve të punës. Afat për dhënie të kësaj parcele e keni të përcaktuar në vendim në pikën 1 dhe 2, nga 1 -15 vite, po ashtu çmimi fillestar për dhënie të kësaj prone po ashtu është i përcaktuar në bazë të rregullores, pastaj për kritere dhe ofertat është i caktuar komisioni për dhënien në shfrytëzim të hapësirave të Komunës së Rahovecit.

Rasim Fazliu – Përshëndetje për të gjithë të pranishmit në sallë, ne edhe në KPF e kemi shqyrtuar këtë pikë, ku e kam pyetur drejtorin se deri tani kjo sipërfaqe a ka qenë e shfrytëzuar nga dikush, përgjigja e drejtorit ka qenë jo, por sipas informatave që i kam në këtë vend ishte dikush i vendosur me mjete të punës, por kjo nuk është shumë me rëndësi. Prandaj ne si grup i PDK-së e kemi shqyrtuar këtë çështje dhe jemi pro këtij propozimi, sepse me anë të kësaj bëhet ruajtja dhe rritja e vlerës së pronës publike, po ashtu bëhet punësimi i qytetarëve, shkurtë kjo është në dobi të qytetarëve të Komunës së Rahovecit. Kurse sa i përket afatit kohorë nëse pajtohen edhe kolegët e tjerë ndoshta kishte me qenë e mjaftueshme të jetë për periudhën dhjetë vite (10).

Fehmi Cena - Edhe ne si grupe i LDK-së e kemi shqyrtuar këtë pikë dhe jemi për dhënie në shfrytëzim të kësaj prone komunale personave fizik dhe juridik, sepse konsiderojë se dobia është e dy anshme. Kjo duhet

të bëhet përmes ankandit publik, ku pastaj do të caktohen kriteret e caktuara për ato firma ose bizneset të cilat i plotësojnë kushtet ose kriteret, sa i përket afatit kohorë edhe ne jemi pro që të jetë për 10 vite.

Dervish Çadraku – Përshëndetje për të gjithë të pranishmit, edhe ne përfaqësuesit e VV-së jemi pro këtij propozimi, madje mundet lirishtë të themi se kjo punë është vonuar sepse kjo punë ka shumë rëndësi për bizneset tona që ti shfrytëzojnë këto hapësira për të bërë biznes. Ne kemi informata që kjo nuk ka qenë në shfrytëzim deri tani, pyetje ime është pse nuk është marrë ndonjë iniciativë deri tani që ky objekt dhe kjo hapësirë të shfrytëzohet nga dikush dhe jo të mbetet kaq gjatë pa u shfrytëzuar. Pra pyetje ime është sa gjatë ka qenë kjo e pa shfrytëzuar, përndryshe edhe ne jemi dakord që kjo të jepet në shfrytëzim për 10 vite.

Ali Morina – Përshëndetje për të gjithë të pranishmit, edhe ne si grupe i AAK-së e mbështesim këtë propozim vendim dhe konsiderojmë se afati i propozuar nga z. Rasim Fazliu është optimal, prandaj jemi pro këtij afat prej 10 viteve.

Masar Popaj – Përshëndetje për të gjithë të pranishmit, kam një pyetje për drejtorin, i nderuar a kemi të bëjmë me objekt apo sipërfaqe, pastaj nëse nuk ka objekt a do të ndërtoj komuna objektin apo do të ndërtoj vetë personi i cili e fiton ankandin, sepse sa e di unë një objekt në këtë vend ka filluar të ndërtohet pa pëlqimin e komunës, por pastaj është ndërprerë ndërtimi.

Artan Asllani – Të nderuar ju faleminderit për pyetjet e parashtruara, i nderuari z. Rasim Fazliu kjo hapësirë e jashtme nuk është shfrytëzuar asnjëherë, por nuk do të thotë që nëse nuk është shfrytëzuar asnjëherë ne mos ta qesim në ankand publik. Po ashtu ne nuk mundmi me e qitë në kuvend pa na ardhur kërkesat nga bizneset, tani aty janë disa biznese që vitin e kaluar kanë marrë grande nga Qeveria e Republikës së Kosovës, tani ju është mbetur inventari jashtë dhe nuk po kanë mundësi të zhvillojnë aktivitetin banesor. Tani na janë drejtuar me kërkesë për marrje me qira të kësaj parcele, prandaj ne ju kemi drejtuar tani juve dhe ju jeni ata që vendosni, po ashtu është e vërtetë se një biznes ka filluar që të ndërtoj një objekt në këtë parcelë, por si kemi marrë informacionin, inspektorati ka dalë në teren dhe ja ka ndërprerë punimet. I nderuari z. Fehmi Cena sa i përket ankandit publik është komisioni i formuar nga kuvendi që vendos sa i përket kriterëve dhe kushteve që duhet të i plotësoj një biznes.

Munib Durguti – I nderuar drejtor ku gjendet ky objekt dhe sa është i madhe ky objekt, ne nuk kemi ndonjë orto foto, përkundër asaj që kanë qenë kërkesat në të kaluarën që kur të vendoset për pronë të jepet informacioni në hollësi. Pastaj ne këtu jemi të thirrur që të vendosim për një hapësirë prej 800 m², prandaj po ju rikujtoj se nuk ka mundësi të zhvillohet biznesi vetëm në një objekte nëse nuk përfshihet edhe hapësira e jashtme, ka mundësi që në një të ardhme të afërt të lindë edhe ndonjë konflikt mes operatorëve.

Kryesuesi – Ju faleminderit të gjithëve për pyetjet e bërë, e qes në votim propozimin e z. Rasim Fazliu që kjo pronë të jepet për 10 vite: Konstatohet se unanimisht është votuar pro propozimit të z. Rasim Fazliu. Tani të nderuar e qes në votim Propozim Vendimin e Kryetarit të Komunës, për dhënien e pronës së paluajtshme komunale në shfrytëzim afatshkurtër personave fizik dhe juridik: Konstatohet se unanimisht është votuar pika e tretë (3) e rendit të ditës. Kalojmë në pikën e radhës të rendit të ditës:

4. Shqyrtimi dhe aprovimi i Propozimit të Kryetarit të Komunës për ndryshimin dhe plotësimin e Rregullores për Taksa, tarifa, ngarkesa dhe gjoba komunale.

Artan Asllani – Drejtoria të cilën unë e drejtoj për këtë mbledhje ka përgatitur ndryshimin dhe plotësimin e Rregullores për Taksa, tarifa, ngarkesa dhe gjoba komunale 01 Nr.576 të datës 28.02.2017, konkretisht neni 23 të kësaj rregullore. Tabela sipas kodeve të zyrës së ARBK-së, si propozim janë gjithsej 6 kode, kodi 1102, 4711, 4721, 4724, 4751 dhe 4775. Po ashtu sa i përket ndryshimit të kësaj rregullore na ka ardhur edhe një propozim për ndryshimin e tasave nga Qendra për Punë Sociale në nenin 17.5. Arsyeja dhe qëllimi i këtyre ndryshimeve është që tu jepet përkrahja bizneseve të vogla të Komunës së Rahovecit, ne jemi të gjithë dëshmitar se bizneset e vogla të komunës sonë janë çdo ditë në shuarje, prandaj ne e kemi bërë këtë propozim për lirimin e tyre nga këto taksa komunale. Sipas raportit të përgatitur nga zyrtari për taksa, na dele se janë dikur rreth 1330 biznese që do të përfitojnë lirimin e kësaj takse dhe vlera vjetore në total kapë shifrën rreth 7,500.00 €. Kurse tek ndërmarrjet prodhuese sipas kësaj rregullore neni 23.4 ceket se

ndërmarrjet që i punësojnë mbi 5 punëtor janë të liruar për dy vite nga taksa, 10 punëtor lirohen për 3 vite, 20 punëtor për 4 vite e kështu me radhë.

Fehmi Hoxha – Përsëritet për të gjithë të pranishmit, më vije shumë mirë që pas kërkesës që e bërë para dy mbledhjeve Drejtorit të Ekonomisë si subjekt i PDK-së që të lirohen nga taksa bizneset e Komunës së Rahovecit, edhe pse jam duke i parë disa biznese këtu në propozim që kanë qenë të liruara më herët, por besoj se drejtori na shpjegon. Por desha të ndërlidhem edhe me një kërkesë të cilën e kanë bërë dhjetë avokatë, ku ju kanë drejtuar Kuvendit të Komunës së Rahovecit, ku kanë kërkuar që në plotësim ndryshimin e Rregullores për Taksa, tarifa, ngarkesa dhe gjoba, të lirohen edhe ata nga taksa vjetore. Të nderuar mbi 90% të komunave të Republikës së Kosovës e kanë liruar këtë kategori sepse edhe kjo llogaritet biznes, kjo kërkesë ka shkuar tek zyra e kryesuesit të kuvendit, por ata ju janë drejtuar Kuvendit të Komunës së Rahovecit. Kryesuesi ju ka kthyer një përgjigje negative atyre dhe besoj se ko është një gabim i madh, sepse kryesuesi nuk ka të drejtë një gjë të tillë të bëjë sepse ata ju janë drejtuar anëtarëve të kuvendit. Po ju them këtu publikisht që ata kanë dashur të ju bëjnë edhe kallëzim penal, por nuk i kam lejuar sepse ju kam thanë që është bërë një gabim teknik ose prej mos dijes. I nderuari kryesues kur një kërkesë i drejtohet kuvendit komunal atëherë ajo kërkesë duhet të vije tek ne, ju nuk keni të drejtë të i ktheni përgjigje. Prandaj i nderuari kryesues propozoj që për këtë mbledhje në këtë pikë të rendit të ditës të futet edhe propozimi imë për lirim nga taksa edhe veprimtaria e avokatëve të cilët veprojnë në komunën e Rahovecit.

Rasim Fazliu – I nderuari kryesues e kam ngritur shqetësim edhe në mbledhjen e KPF-së që janë duke ndodhur disa ndryshime të forta rreth taksave dhe tarifave, por ne sot duhet të vendosim si kuvend. E falënderoj kolegun që e dha një kontribut rreth propozimit për ndryshimin e Rregullores për taksa, tarifa, ngarkesa dhe gjoba, do të ndalem tek tarifat e QPS-së. Më duke e pakuptimtë dhe pa arsyeshëm që të na vinë tarifat kaq të ngritura tek sektori i QPS-së, p.sh taksa për vërtetimin për humbje të nënshtetësisë 5 € është për momentin, kurse propozimi është që të ritet në 20 €, por këto janë propozime por kuvendi është ai që vendos. Pastaj taksa vërtetimi i zotësisë së vapimit për punësim fillestar, mendoj se propozimi i dhënë është goxha i lartë sepse jemi dëshmitar të asaj se shumë pak kemi mendësi ne si komunë të punësojmë njerëz, dhe në një konkurse konkurrojnë deri në 50 aplikues dhe nga ta vetëm njëri pranohet, prandaj propozimi që taksa nga 5 € të ritet në 10 € është gabim, unë kisha propozu që kjo taksë të jetë më e vogël se 5 €, sepse sa herë që të përsëriten konkurset me nxjerrë këtë vërtetim është shumë keq. Do të dalë me propozime konkrete, prandaj ne si grup i PDK-së jemi pro asaj që tarifat për sektorin e QPS-së të jenë si në vijim: Taksa nga nr.5 e deri tek nr.10 është propozuar që të hiqet të bëhet zero edhe ne si grup i PDK-së pajtohemi, kurse taksat tjera të mbeten ashtu siç kanë qenë, po ashtu duke e bashkangjitur edhe propozimin paraprak që e bërë z. Fehmi Hoxha sa i përket taksës për avokatë.

Munib Durguti – Po ashtu edhe unë e mbështesë kërkesën e avokatëve dhe mendoj se është shumë e arsyeshme që të aprovohet kjo kërkesë edhe për një arsye shtesë, ngase ju kujtoj se nga viti 2010 -2011, kur janë bërë reforma në sistemin gjyqësor, me daljen e noterëve për herë të parë në Kosovë, shumë veprimtari të avokatëve kanë kaluar në fushë veprimtarin e noterëve.

Fehmi Cena – Është shumë e qartë që nga ne kërkohet që të bëhet plotësim ndryshimi i Rregullores për, taksa, tarifa, ngarkesa dhe gjoba komunale, konkretisht në dy nene, neni 23 dhe neni 17.5. tek neni 23 i cili ka të bëjë me Drejtorin për Ekonomi dhe turizëm, ku kërkohet që të lirohen disa kategori të bizneseve nga taksat komunale, kryesisht kategori tregtare. Kurse në nenin 17.5 i cili ka të bëjë me kategorinë e QPS-së, kërkohet që të bëhet ndryshimi i disa tarifave për shërbime në këto institucione, shumica prej këtyre kërkohet që të ritën tarifat dhe disa nga at të largohen të gjitha. Ne si grupe i LDK-së mendojmë se është koha dhe momenti që bizneseve tona të i dilet në ndihmë përmes këtyre lirimeve, ne në KPF kemi kërkuar edhe disa sqarime shtesë të ne jepen sot këtu, ne kemi kërkuar saktë sa është numri i bizneseve që do të lirohen nga kjo taksë. Shuma të cilën e ceku drejtori që inkasohet nga këto biznese nuk na duket shumë reale, ne e kemi parasysh se buxheti i komunës do të dëmtohet gjithsesi nga mos inkasimi i këtyre të hyrave, por komuna dhe qeveria lokale ka për detyrë që të gjejë edhe forma të tjera që të kompensohet kjo pjesë e mos inkasimit. Po ashtu pajtohemi me propozimin e z. Fehmi Cena që kërkesa e avokatëve të jetë

pjesë e kësaj liste, pra që të lirohen nga taksa, është mirë që tu ndihmohet edhe këtyre në një formë për zhvillimin e bizneseve. Neni 17.5 tek pjesa e QPS-së, ne edhe në mbledhjen e KPF-së kemi pasur disa vërejtje në lidhje me disa ngritje që janë bërë në taksat e kësaj drejtorie, dhe këto vërejtje nuk janë mare parasysh, jemi duke i parë se edhe në këtë mbledhje na kanë ardhur ashtu siç kanë qenë në KPF. Jam i mendimit se këto janë kategori sociale dhe nuk duhet të bëhet ngjitje, ato që janë prezantuar që të hiqen jemi pro, kurse sa i përket atyre që janë prezantuar që të ngritën ne jemi kundër.

Ali Morina – Sa i përket këtij ndryshimi për Rregulloren për Taksa, tarifa, ngarkesa dhe gjoba, ne si grupe i AAK-së e mbështetim këtë propozim, por vetëm taksa për vërtetimi i zotësisë së veprimit për punësim fillestar të mbetet ashtu siç ka qenë 5.00 €, kurse sa i përket pjesës tjetër jemi pro ashtu siç e ka propozuar drejtori.

Dervish Çadraku – Pjesërisht edhe unë pajtohem me disa propozime të parafolësve, por më duke si nga pak po i vije era e zgjedhjeve dhe jeni duke i hequr të gjitha këto taksa, në mënyrë që të dilni sa më mirë qytetarëve, por duhet të dini se këto taksa janë ato që i mbushin arkat e komunës, në mënyrë që pastaj qytetarët të kenë një mirëqenie sa më të mirë. Prandaj mendoj se kishte me qenë mirë që të jemi pak më real dhe më konkret, pra të i njohim gjërat për të cilat jemi duke biseduar këtu, ne po ashtu jemi dakord që avokatëve të i hiqen taksat por jeni duke parë propozimet për QPS-në që i kemi ngarkuar menjëherë me një peshë shumë të rëndë, kemi taksa që kanë që janë propozuar të ndryshohen nga 5.00 € në 20.00 €. Avokatët dhe disa kategori tjera që janë më mirë se kjo kategori që e përmenda më parë, prandaj unë jam i propozimit që këto kategori që janë propozuar për 20.00 € të jenë 10.00 €.

Sali Sallteku – Përshëndetje për të gjithë të pranishmit, I nderuari kryesues sa e di është punësuar një lektore në komunë, dhe kishte me qenë mirë që të bëjë lektorimin e këtyre materialeve, sepse me të vërtet ka gabime shumë. Drejtori e tha se ne jemi duke i falë disa kategori të bizneseve që janë të vogla, nuk e besoj se janë të vogla kategoritë ose taksa për prodhimin verës që është 500.00 €, jam pro që të lirohen disa biznese, por jam pro propozimit të shefit të grupit, ato që janë propozuar që të hiqen le të hiqen, kurse ato që janë le të mbesin ashtu siç kanë qenë e jo të ritën, kjo do të jetë në dobi të qytetarëve.

Nënkryetari – Përshëndetje për të gjithë të pranishmit, ne e kuptojmë se veç në një para fushat jemi, por ne nuk jemi evlia që të dimë se kur do të ndodhin zgjedhjet, ky propozim ka qenë edhe më herët nga Drejtoria për Ekonomi dhe zhvillim. Do të ndërlidhem me një taksë sa i përket QPS-së, sa i përket taksës së Konstatimit për humbjen e shtetësisë, në MPB kjo taksë paguhet 150.00 €, kurse ne në komunë kemi bërë një ngritje prej 5.00 € në 20.00 €, pastaj taksa e vërtetimit që nuk ju është hequr zotësia e veprimit, ko është që të konstatojnë se a je i aftë për një punë apo jo, këtu ceket për armëmbajtje. Të nderuar për një provim për armëmbajtje duhet të paguash 200-300 €, pastaj për të blerë një armë duhet të paguash nga 800.00 € e më lartë, kurse ne e kemi propozuar taksën nga 5.00 € në 20.00 €, nëse ky person i ka deri në 2,000.00 € të i shpenzoj për leje të armëve dhe blerje, do ti ketë edhe 20.00 € të i paguaj komunës taksë. Ka mundësi disa taksa të mbeten ashtu siç janë si taksa vërtetim për punësim, por disa taksa me të vërtet kanë arsyetim të fortë pse duhet të ritën. Kurse sa i përket propozimeve për lirim të taksave tek Drejtoria e Ekonomisë, të nderuar ne e kemi bërë lirim e taksave edhe më parë, në mandatin e kaluar kemi falë bukur shumë borxhe bizneseve. Ndërsa sa i përket kërkesës së fundit që e ngriti z. Hoxha për avokatë, sa e di unë në mandatin e kaluar sa kemi qenë na plotësim ndryshimi i Rregullores për taksa dhe tarifa është ngritur kjo taksë sepse kemi thënë se ata nga puna e tyre përfitojnë goxha shumë mjete, dhe në atë kohë ne kemi qenë të gjithë të pajtimit që kjo taksë të ngritet. Sa i përket kërkesave që i drejtohen kryesuesit të kuvendit ose kryetarit, pastaj përgjigja që ju është kthyer nga kryesuesi, i nderuar ata munden të ngrisin kallëzim penal, por në kërkesa kjo nuk lejohet, po ashtu përgjigja tjetër mundet të jetë e thjeshtë mundet me qenë inkopetencia, një organ i drejtohet një organi, kurse organi tjetër ka menduar që ti përgjigjet, pra thjeshtë është inkopetencia. Por ju jeni kuvendar dhe ju jeni ata që vendosni në fund që e aprovon me votat e juaja, pra ju jeni organi i cili merë vendime përfundimtare.

Kryesuesi – Të nderuar e vë në votim një herë propozimin e z. Fehmi Hoxha, i cili propozoi që taksa për avokatë të hiqet dhe të jetë zero €: Konstatoj se me 16 vota për, 11 kundër dhe asnjë abstenim është

aprovuar kërkesa e z. Fehmi Hoxha. Tani të nderuar anëtar të kuvendit e vë në votim propozimin e Drejtorit të Ekonomisë sa i përket taksave që i takojnë drejtorisë së ekonomisë: Konstatohet se në mënyrë unanime është aprovuar plotësimi ndryshimi i taksave nga drejtoria e ekonomisë.

Kryesuesi – Të nderuar anëtar të kuvendit do të bëjmë 5 minuta pauzë, kjo bëhet me kërkesë të shefave të grupeve të cilët kërkojnë të diskutojnë sa i përket taksave për QPS-në.

Të nderuar kuvendar besoj se pas pauzës që e patët jeni konsultuar dhe keni ardhur me ndonjë propozim konkret sa i përket taksave për QPS-në.

Rasim Fazliu – I nderuari kryesues ne shefat e grupeve politike e mbajmë një takim ku u pajtuam për të gjitha pikat një nga një, po ju lexoj një nga një tarifat e QPS-së në nenin 17.5. Po ju prezantoj me pika ashtu siç janë të renditura, propozimet tona janë këto: Pika 1 -10.00 €, pika 2 – 10.00 €, pika 3 – 20.00 €, pastaj kemi edhe dy nën pika të numrit tre, 3.1 – 5.00 €, 3.2 – 5.00 €, pika 4 – 10.00 €, pikat, 5,6,7,8,9 dhe 10, jemi pro propozimit të drejtorit i cili ka propozuar që të hiqen këto taksa dhe të jenë zero. Vazhdojmë me pikën e 11 – 5.00 €, pika 12 – 5.00 €, gjithashtu pika 13 – 5.00 €. I nderuar kryesues ky është qëndrimi i të gjitha grupeve politike rreth taksave të QPS-së.

Kryesuesi – Ju falënderoj për bashkëpunimin e treguar, tani të nderuar kuvendar e vë në votim Propozimin e Kryetarit të Komunës për ndryshimin dhe plotësimin e Rregullores për Taksa, tarifa, ngarkesa dhe gjoha komunale, kësaj i bashkëngjitet propozimi i z. Fehmi Hoxha: Konstatohet se unanimisht aprovuar pika e katërt (4) e rendit të ditës. Kalojmë në pikën e radhës të rendit të ditës:

5. Informata mbi implementimin e Planit për investime në hapësirat e hapura publike në Komunën e Rahovecit.

Përparim Krasniqi – Të nderuar kuvendar/e sa i përket hapësirave të lira publike apo implementimit të planit për investime publike, ne e kemi një kontratë e cila është e ndarë në tre pjesë e cila bënë mirëmbajtjen e këtyre hapësirave, e keni para vete edhe raportin ku janë të cekura edhe shënimet në detaje. Nuk do e zgjasja më shumë pasi e keni para vete informata, nëse keni pyetje këtu jam për të ju përgjigjur.

Ali Morina – Ajo që më intereson të di është se a janë të përfshirë të gjitha hapësirat publike në të gjithë komunën e Rahovecit, flasë posaçërisht për fshatin Ratkoc sepse është një pjesë e cila është e rregulluar tek lumi por nuk ka kurrfarë mirëmbajtje. Kërkesa e banorëve të fshatit është që kompania e cila është e kontraktuar të bëjë mirëmbajtjen e kësaj hapësire, kam biseduar me udhëheqësit e kësaj kompanie, ata më kanë thënë nuk e kanë për detyrë të e mirëmbajnë këtë hapësirë, ka pasur raste kur ata me vetë dëshirë e kanë mirëmbajtur. Po ashtu është edhe një pjesë që ne e quajmë tek Bunari i madh, është një monument identifikues për fshatin tonë, ku një mërgimtarë e jona me vetëfinancime ka rregulluar këtë vend, por aktualisht aty nuk ka mirëmbajtje, bari është pothuajse një metër, ulëset që janë aty po ashtu janë dëmtuar. Pyetje ime është a i keni vë në listën e mirëmbajtjes së hapësirave publike për vitin e ardhshëm apo jo.

Dërvish Çadraku – Falënderoj drejtorin për këto informata që na i ka sjellë, por unë kam disa vërejtje rreth kësaj informate sepse sipas meje këtë informata ju e keni bërë nga zyra, sepse disa gjëra nuk përputhen me ato që na i ke shkruar në këtë informata. E marr shembull hyrjen në Rahovec nga Xërxa kur vije, tek rreth rrotullimi asnjë bimë nuk është e freskët, ne raste të tilla kemi sa të duash, prandaj është mirë që ata që e marrin detyrën për mirëmbajtje të këtyre hapësirave gjelbëruese të i mbikëqyrin këto hapësira, sepse nuk janë duke bërë punën mirë sa i takon mbijetesës së bimëve. Mendoj se duhet të bëhet një komision më ekspeditiv, po ashtu ka disa vende në komunën tonë të cilat duhen të rrafshohen, të hiqen barojat e mëdha që janë bërë dhe pastaj të mirëmbahen. Kemi një ratë të mirë në fshatin Fortesë, kemi disa hapësira nuk e di a i mirëmbajnë vet banorët e fshatit apo kompania, sidoqoftë por është mirë që edhe në Malësi të Vogël, Ratkoc dhe fshatrat e tjerë të i keni nën mbikëqyrje sepse me të vërtetë është si në xhungël. Pastaj kishte me qenë mirë që të formohet një komision ose nga ju si drejtori ose nga kuvendi, komision për vetëdijesimin e qytetarëve, ky komision të shkojë nëpër shkolla të mbajë ligjëratat për vetëdijesim ku të ju shpjegohet fëmijëve se mbeturinat nuk duhet hedhë rrugëve. Po ashtu duhet të vendosen më shumë në ato pjesë ku ka më shumë qarkullim të fëmijëve, prandaj mendoj se ka ardhur koha që të kemi veprime konkrete.

Trajko Shqariq – Ato që desha të them shumicën i tha parafolësi, është e vërtetë që ka disa vende që nuk ngjajnë fare në hapësira të gjelbëruara, ka shumë nevojë për mirëmbajtje, po ashtu pajtohem edhe me propozimin që e dhe i nderuari z. Çadraku që të punohet më shumë rreth ngjitjes së vetëdijes së qytetarëve që mos të hedhin mbeturina vend e pa vend, po ashtu duhet të mësohemi që të mirëmbajmë edhe vetë ato hapësira të gjelbëruara.

Fehmi Cena – E përshëndesim Drejtorin e Shërbimeve Publike i cili na ka sjellë informatën për mbi implementimin e planit për investime në hapësirat publike, e kemi parë që plani është 5 vjeçar, po ashtu e kemi kuptuar se ka pasur rritje të sipërfaqeve për mirëmbajtje, por po ashtu është rritur edhe pagesa rreth mirëmbajtjes. Ne edhe si kuvendar por edhe si qytetar kërkojmë që të rritet përgjegjësia e këtyre operatorëve ekonomik në mirëmbajtjen e këtyre hapësirave, ne shumë shpesh kemi pasur edhe vërejtje konkrete sa i përket hapësirave publike në këtë sallë sepse operatorët nuk janë kujdesur aq sa duhet. Shembull konkret për mos mirëmbajtje janë varrezat, në ato vende ku është bari po mirëmbahet, kurse në ato vende ku janë rritur tharat ku pastaj ato bëhen kaçube askush nuk po ndërhyrë. Të nderuar mirëmbajtje do të thotë të i asgjësosh të gjitha a jo vetëm barin. Sa i përket drunjtëve dekorativ që janë mbjellë skaj rrugës ne e kemi përkrah këtë projekt, por nëse ndalemi tani të i shohim këto drunjtë dekorativ, do të shohësh se ato janë në një gjendje të mjerueshme, një pjesë e madhe e tyre janë tharë. Në të kaluarën e kam bërë një pyetje ku e kam pyetur drejtorin a është në kontratë edhe mirëmbajtja e tyre apo vetëm mbjellja, nga drejtori kam marrë përgjigje se ata 2-3 vite kompania e ka marrë përsipër mirëmbajtjen e tyre, kurse në realitet këto drunjtë nuk janë duke u mirëmbajtur sepse janë duke u tharë.

Ali Zhuniqi – desha të ndërlihem rreth diskutimit të z. Dervish Çadrasku, i nderuar hapësirat publike në fshatin Fortesë mirëmbahen kryesisht nga banorët e këtij fshati, por ajo që kam kërkuar unë nga drejtori i shërbimeve publike është që të bëhet pastrimi i lumit i cili përçon fshatin Fortesë. Një pjesë e kanalizimit është bllokuar dhe si rrjedhojë e kësaj një pjesë e kanalizimit derdhet në lumë dhe kjo pastaj e bënë edhe ndotjen e ambientit, ku kundërmon erë dhe shkakton goxha problem për banorët të cilët jetojnë përreth kësaj pjese.

Masar Popaj – I nderuari kryesues desha të ndërlihem tek lotot që janë të cekura këtu në këtë informatë shkruan Loto 1 - 16,709.28 €, loto 2 – 21,359.06 dhe loto 3 – 15,233.76 €, vlera totale është 53,302.16 €. I nderuar këtu vlera nuk është e saktë, është bërë një gabim teknik dhe ky gabim duhet përmirësuar sepse ky është një dokument zyrtar, sepse sipas llogarisë sime nëse i mbledhim shumën e këtyre tre lotove do na dele në fund shuma 53,302.10 €.

Rasim Fazliu – E falënderoj drejtorin që na ka sjellë këtë informatë, këtu janë të cekura disa të dhëna konkrete, tek pika 2 ceket: Mirëmbajtjen e ambienteve të ndërtuara, sheshe, i nderuar duhet të jetë shesheve, shtigjeve për këmbësor dhe sipërfaqe të shtruara. Pastaj tek pika nr.3 shkruan: Mirëmbajtje të hapësirave për parkim automjesh, i nderuar edhe këtu mendoj se duhet të jetë mirëmbajtje e hapësirave publike për parkimin e automjeteve. I nderuar është mirë që të përmirësohen këto gabime drejtshkimore. Kurse sa i përket rezultateve është e vërtetë që shihen disa hapësira të mirëmbajtura, ku janë mbjellë disa drunjtë dekorativ dhe me këtë duhet të jemi të kënaqur edhe ne si anëtar të kuvendit komunal. Por ajo që dua të them është se kanë mbetur edhe disa vendbanime tjera pa këto drunjtë dekorativ, prandaj është mirë që të vazhdohet me mbjelljen e këtyre drunjtëve. Sipërfaqet e gjelbëruara mirë që janë duke u mbikëqyrur, por pajtohem me disa koleg që thanë se janë disa mjedise të cilat ndodhen në mes të fshatrave, konkretisht në fshatin Celinë, jashtë oborrit së shkollës është një hapësirë goxha e madhe e cila nuk është aspak e mirëmbajtur. Kishte me qenë mirë në këtë pjesë që e ceka të bëhet së pari rrafshimi i dheut, dhe të hiqen ato baroja dhe me këtë do të krijohej një hapësirë e gjelbëruar. Ajo që më ka lënë përshtypje tek kjo informatë është se ju e thatë që para se të filloj projekti i mirëmbajtjes së hapësirave publike, kontratat e komunës së Rahovecit kanë qenë të identifikuar në masë jo të duhur, por ë vitin 2018 kjo ka ndryshuar. Kjo është shumë në rregull sepse vite pas viti duhet të ndryshohen gjërat, por ndoshta kësaj informate është dashur të shtohet që qeverisja e kaluar nën udhëheqjen e z. Idriz Vehapi, ka qenë një qeverisje transparente, me një performancë të mirë, ju vetë jeni në dijeni sepse keni qenë anëtar i kuvendit, komuna jonë e ka zënë vendin

e tretë për përmirësimin e shërbimeve publike, ku DEMOSI e ka shpërblyer me mjete të caktuar. Në vitin 2018 kur ju keni ardhur në qeverisje i keni trashëguar këto mjete, ku më pas me ato mjete ju keni punuar. Kurse kur vijmë tek lotot, mendoj se është ndarë goxha një shumë e mirë, prandaj mendoj se me këto shuma ka mundësi edhe ato hapësira që i cekëm ne që nuk janë duke u mirëmbajtur të mirëmbahen. Pajtohem e mate që e tha z. Ali Zhuniqi sepse në Fortesë kur kalojmë të gjithëve na lënë përshtypje se si mirëmbahen hapësirat e gjelbëruara, pra banorët e këtij fshati janë vetëdijesuar që duhet të mirëmbahen vendet e hapura publike, prandaj rreth kësaj duhet punohet më tepër si ne ashtu edhe qeverisja lokale.

Afërdita Thaqi – Do ndërlihem me diskutimin e z. Rasim Fazliu, e vërejta se ai disa herë i potencoi gabimet drejtshkrimore që janë duke bërë në materialet e mbledhjes së kuvendit, të gaboje dikush nga ne është diçka tjetër, por të gaboje kuvendi komunal është diçka e madhe. Sa jam e informuar unë ju e keni punësuar një lektore, a është duke e kryer ajo punën e saj apo jo, siç po duke edhe me atë nuk është diçka në rregull.

Kryesuesi – E nderuar ajo është duke e kryer punën e saj me shumë përkushtim, por ajo ka bukur shumë ngarkesë, të gjithë këtë material që ne e kemi sot këtu ajo duhet ta lekturojë.

Refki Kryeziu – Sa i përket mirëmbajtjes së hapësirave publike në mes të fshatit Xërxë gjendet një hapësirë publike, por asnjë herë nuk është pastruar nga kompania përgjegjëse, prandaj kishte me qenë mirë që edhe kjo hapësirë të përfshihet në mirëmbajtje.

Rukije Krasniqi – Do të ndalem tek synimet dhe objektivat, mendoj se synimi dhe objektivi duhet të jenë hapësirat publike shkollore, si dhe institucionet tjera komunale sepse duhet të jemi shembull qytetar të cilët munden të reflektojnë tek familjarët e tyre. Hapësirat e gjelbëruara dhe pemët dekorative ndikojnë shumë pozitivisht, e sidomos në shkollë, është një relaksim për fëmijët dhe mësimmshënësit po ashtu kjo ndikon pozitivisht në mirëqenien e tyre.

Fehmi Hoxha – I nderuari drejtor tek synimet keni bërë një krahasim ku keni cekur se deri në vitin 2016 janë investuar rreth 25,000.00 € në mirëmbajtjen e hapësirave publike, por pyetje ime për ju është sa mjete janë ndarë në vitin 2017 për mirëmbajtje të hapësirave publike, po ju them unë në vitin 2017 janë ndarë afro 39,000.00 €. Prandaj duhesh të cekës për çdo vite se sa kanë qenë mjetet e ndara për këtë kategori, uroj që të mbërrij edhe më shumë se 150,000.00 € për këtë kategori, sepse shumë është me rëndësi që të mirëmbahen hapësirat publike. Po ashtu do të ndërlihem me diskutimin e znj. Rukije Krasniqi, sa i përket krijimit të hapësirave publike në shkollë, e nderuar DKA-ja e ka grandin specifik, ata duhet të parashohin në kuadër të investimeve kapitale edhe mirëmbajtjen e hapësirave të brendshme ose oborreve të shkollave.

Përparim Krasniqi – Të nderuar ju falënderoj për pyetjet e bëra, ne jemi duke u munduar që të ja dalim mirë me ambientin, komuna e Rahovecit është përfituese e grandit të performancës në këtë aspekt. Sa i përket gabimeve drejtshkrimore të nderuar ne në Planin për Investime Publike i cili është aprovuar po nga ky kuvend është aprovuar me këto gabime drejtshkrimore, këtë plan nuk e kemi bërë ne por e ka bërë DEEMOSI, dhe ne të gjitha shënimet i kemi mare po nga ky plan. I nderuari z. Ali Morina është e vërtetë që ka qenë në kontratë për pastrim dhe një herë është bërë, por siç e dini këtë vite kemi pasur të reshura të shumta dhe nuk kemi pasur mundësi të bëjmë pastrimin e këtij lumi. I nderuar z. Dervish Çadraku mund të ju them lirishtë se është hera e dhjetë që po ndërhyjmë në atë rreth rrotullim në hyrje të Rahovecit, por ndoshta është e vërtetë që nuk janë ujitur ato lule aq sa duhet për të mbijetuar. Ne e kemi pasur një rast tek rreth rrotullimi te pompa Shell në hyrje të Suharekës, aty e ka mare përsipër që të mirëmbaj, por fatkeqësisht nuk e ka mirëmbaj dhe janë tharë ato drunjtë dekorativ. Por ne në vitin e ardhshëm do të identifikojmë këtë si problem dhe do të fusim në listën e mirëmbajtjes nga komuna. shumë pyetje janë bërë të njëjta, sa i përket mirëmbajtjes së varrezave është vërtetë që duhet të ritën edhe monitoruesit që i përcjellin këto punime dhe mos të lejohen të mbetet diçka pa u pastruar në pjesën e varrezave. Po ashtu është e vërtetë që pjesa e Fortesës është mare edhe si model në krahasim me vendbanimet e tjera, sepse banorët e këtij lokaliteti hapësira e cila gjendet në rrugën kryesore të fshatit e mirëmbajnë vetë, kurse pjesët tjera si varrezat civile, pjesët e tjera të lapidarëve, varrezat e dëshmorëve që janë në kuadër të kontratave këto i mirëmban komuna vazhdimisht. I nderuar z. Rasim Fazliu ne këtë vit jemi në fazën e kontraktimit të kontratës së dytë sa përket

10000 drunjtëve dekorativ, pra ato vendbanime që nuk janë mbuluar me kontratën e parë do të mbulohen tani me këtë kontratë. Sa i përket propozimit që e dha e nderuara znj. Rukije Krasniqi, e nderuar hapësirat e lira publike të cilat gjenden brenda institucioneve nuk përfshihen në këtë kontratë, si p.sh oborret e QKMF-ve, të shkollave, të shtëpive të kulturës etj. pastaj komuna e Rahovecit kufizohet me shumë rrugë rajonale, këto rrugë i menaxhon ministria dhe ajo i kontraktton për mirëmbajtje, fatkeqësisht këtë vite vetëm një herë është bërë mirëmbajtja. Ne tani e kemi formuar një komision ku i kemi identifikuar zonat të cilat nuk kanë qenë pjesë e kontratës, prandaj vitin e ardhshëm ndoshta do të rritet vlera pak sepse, këtë vite do të ndërtohen disa parqe, po ashtu pastaj ato duhet të mirëmbahen. Kurse sa i përket propozimeve të z. Dervish Çadraku, i nderuar nëse dëshironi që kuvendi ta ketë nga një përfaqësues në këtë komision s ai përket vetëdijesimit të qytetarëve rreth hedhjes së mbeturina, por ndoshta duhet të bëhet një projekt se si do të duket kjo formë e prezantimit, a do të ketë kjo ndonjë kosto financiare apo jo, a do kemi vullnetar në këtë komision, pra janë disa teme që duhet të shtjellohen. I nderuari z. Fehmi Cena në kuadër të kontratave është i planifikuar edhe sigurimi i kontratës dhe drunjtëve nëse thahen, kompania e cila i ka vendos duhet që ti zëvendësoj, pra ata e kanë një periudhë të caktuar të sigurimit.

Ali Zhuniqi – Sa i përket vetëdijesimit, kjo duhet të shkojë në kuadër të Drejtorisë për Rini, kulturë, rini dhe sport sepse shumica e të rinjve e kanë vëmendjen tek kjo drejtori. Ne kemi parë që Drejtoresha e Kulturës së bashku me kryetarin e komunës e kanë nënshkruar një memorandum bashkëpunimi 5 vjeçar me njërin nga organizatat, zakonisht vetëdijesimet e të rinjve zakonisht bëhen përmes OJQ-ve, prandaj ne duhet të u japim OJQ-ve një fond dhe ata të mbajnë nëpër shkolla ligjëratat përkatëse për vetëdijesimin e nxënësve.

Vahid Krasniqi – I nderuari drejtor në fshatin Drenovcë mbi 80% të drunjtëve dekorativ janë tharë, a e keni bërë ndonjë kërkesë për zëvendësimin e tyre.

Përparim Krasniqi – I nderuar sa i përket drunjtëve dekorativ kjo është përgjegjësi e Drejtorisë së Urbanizmit, por sa për informatë në momentin që thahen drunjtë duhet të lajmërohet kompania dhe ajo pastaj të bëjë zëvendësimin me drunjtë e ri.

Kryesuesi – Të nderuar ju falënderoj shumë për kontributin e dhënë sa i përket Planit për investime në hapësirat e hapura publike në Komunën e Rahovecit, po ashtu falënderoj edhe drejtorin për përgjigjet e dhëna. Kalojmë në pikën e radhës të rendit të ditës:

6. Rishqyrtimi dhe aprovimi i Draft – Rregullores Komunale për Transparencë Komunale 2019.

Haziz Krasniqi – Përhëndetje për të gjithë të pranishmit, të nderuar kjo rregullore na është kthyer nga MAPL-ja për rishqyrtim, për arsye se është dashur të bëhet harmonizimi me udhëzimin administrativ 04/2018 dhe me rregulloren për procedurat e hartimit dhe publikimit të akteve komunale 01/2017. Përmirësimi është bërë në faqe nr.3 neni 4 pika 4.6, faqe nr. 5 neni 6 pika 6.9 dhe faqe nr.9 neni 18 pika 18.1 dhe 18.2. pra këto janë ndryshimet që janë kërkuar nga MAPL-ja.

Kryesuesi – Të nderuar e vë në votim Draft – Rregulloren Komunale për Transparencë Komunale 2019: Konstatohet se në mënyrë unanime është aprovuar pika e gjashtë (6) e rendit të ditës. Kalojmë në pikën e radhës të rendit të ditës:

7. Shqyrtimi dhe aprovimi i Propozim Vendimit të Kryetarit të komunës për nisëm e bashkëpunimit komunal ndërkombëtar për binjakëzim midis Komunës së Rahovecit dhe Komunës së Frascineto.

A ka dikush të shtoj diçka sa i përket kësaj pika, nëse jo e vë në votim Propozim Vendimin e Kryetarit të komunës për nisëm e bashkëpunimit komunal ndërkombëtar për binjakëzim midis Komunës së Rahovecit dhe Komunës së Frascineto: Konstatohet se në mënyrë unanime është aprovuar pika e shtatë (7) e rendit të ditës. Kalojmë në pikën e fundit të rendit të ditës:

8. Shqyrtimi dhe aprovimi i Propozim Vendimit të Kryetarit të komunës për nisëm e bashkëpunimit komunal ndërkombëtar për binjakëzim midis Komunës së Rahovecit dhe Komunës së Civita.

A ka dikush të shtoj diçka sa i rreth pikës së fundit, nëse jo e vë në votim Propozim Vendimin e Kryetarit të komunës për nisëm e bashkëpunimit komunal ndërkombëtar për binjakëzim midis Komunës së Rahovecit dhe Komunës së Civita: Konstatohet se në mënyrë unanime është aprovuar pika e tetë (8) e rendit të ditës.

Kuvendar të nderuar ju falënderoj të gjithëve për kontributin e dhënë, mirupafshim në mbledhjet e radhës!
Mbledhja e Kuvendit ka përfunduar në ora 14:40

01 Nr. 05/2019
Rahovec, 26.09.2019

Procesmbajtësi:


Skender Hamza

